

## LE CHAPITRE DE LA CHOSE

*jugée, contenant quarante-cinq versets,  
escriit à la Meque.*

*Mahomet a intitulé ce Chapitre de la lettre  
ك Kaf de l'Alphabet Arabe qui signifie en ce  
lieu الامر كذا كذا el emer, c'est à dire,  
la chose est jugée. Voids Gelaldin & le Be-  
daoï, ils ont intitulé ce Chapitre du Jugement  
ou de la chose Jugée. Plusieurs Mahometans,  
disent aussi que ك Kaf est une montagne qui  
entoure tout ce monde, & que Mahomet iure  
par cette montagne.*

**A**V Nom de Dieu clement & misericordieux.  
Le iure par l'Alcoran digne de loüange, que  
les habitans de la Meque s'estonnent de ce qu'un  
homme de leur nation leur enseigne les tourmens de  
l'Enfer, ils disent qu'il dit des choses estranges; Quoy,  
disent-ils, nous mourrons? nous serons terre? & nous  
retournerons au monde? Voila un retour bien esloi-  
gne. Nous sçavons assurément ce que la terre fera  
d'eux, nous auons un liure ou tout est escriit, ils impu-  
gnent la verité cogneuë & sont dans vne grande  
confusion: Ne voyent-ils pas le Ciel au dessus d'eux,

*Teba est  
un Roy de  
Liemen.  
Voy le  
Bedaos.*

comme nous l'auons basty ? comme nous l'auons orné ? & comme il n'a point de deffaut ? Nous auons estendu la terre , esleué les montagnes , & auons fait produire toute sorte de fruiets pour signe de nostre toute- Puissance. Nous auons enuoyé la pluye beniste du Ciel , nous en auons fait produire des iardins, des grains agreables aux moissonneurs , & des palmiers, les vns esleuez plus que les autres pour enrichir nos creatures , nous en auons donné la vie à la terre morte , seiche & aride , ainsi les morts sortiront des monumens. Le peuple du temps de Noé , Ceux qui habitoient auprès du Puy , Temod , Pharaon , les concitoyens de Loth. Ceux qui habitoient dans la forest , & les gens du Roy Teba , ont dementy cydeuant nos Prophetes , & ont senty la punition promise aux infidelles. Auons nous eu peine de créer les hommes la premiere fois ? neantmoins ils sont en doute s'ils ressusciteront , Nous auons crée l'homme sans peine, nous scauons les mouuemens de son ame, & penetrons dans son cœur, comme le sang dans les veines de son corps. O homme pense au iour que tu verras ton bon & ton mauvais Ange auprès de toy à droict & à gauche, ils ont obserué & escrit tout ce que tu as fait, représente- toy la mort deuant tes yeux, elle est inéuitable : Pense à l'Ange qui sonnera la trompette au iour de la Resurrection, ce iour les meschans verront ce qu'on leur a promis, & tous les hommes viendront deuant Dieu pour estre iugés. Leurs Anges gardiens les conduiront, & seront

seront tesmoins de leurs deportemens : On dira aux infidelles, voicy le iour auquel vous n'avez pas voulu penser, nous vous auons maintenant ouuert les yeux, vous verrez ce iour plus dur que le fer ; Leurs Anges gardiens leur diront, voicy deuant vos yeux tout ce que vous avez fait ; Iettez dedans l'Enfer ces infidelles opiniastres qui ont empesché leur prochain de bien faire, qui ont eu tort de douter de la loy de Dieu, & qui ont dit qu'il y auoit vn autre Dieu avec Dieu, jettez les dedans les plus griefts tourmens ; Alors le Diable dira , Seigneur ie ne les ay pas deuoyés , ils se sont deuoyez eux-mesmes ; Dieu dira , ne disputez pas deuant moy , ce qu'on vous a cy-deuant promis est infallible , ma parole ne reçoit point d'alteration , & ne feray iniustice à personne. Dieu demandera au iour du Iugement si l'Enfer est plein , il respondra , y en a-t'il dauantage ? Le Paradis est préparé pour les gens de bien qui auront la crainte de Dieu deuant les yeux , il est promis à ceux qui se conuertiront , qui obeyront aux commandemens de sa diuine Majesté , & persueueront en leur obeissance. On leur dira ; entrez dedans le Paradis exempts de tous maux, voicy le iour eternel, vous aurez tout ce que vous desirerez & dauantage. Combien auons nous exterminé de puissantes & riches villes aux siecles passez ? leurs habitans cherchent dans leur pays des lieux de retraite, & n'ont pas euité la punition de leurs crimes, cela doit seruir d'exemple à ceux qui le comprennent , à

ceux qui l'écouteront, & à ceux qui l'ont veu. Certainement nous auons créé en six iours sans peine le Ciel & la Terre, & tout ce qui est entr'eux; Perseuerer, ne t'impatiente pas des paroles des infidelles, exalte la gloire de ton Seigneur deuant que le Soleil se couche, & auant qu'il soit leué, prie ton Seigneur à l'entrée de la nuit, le dernier de tout sera l'adoration. Escoute lors que l'Ange t'appellera au Jugement general, ce iour tout le monde entendra la trompette, le peuple sortira des monumens, & la terre s'ouurira deuant les yeux des hommes. Je donne la vie & la mort, & tout le monde sera assemblé deuant moy pour estre iugé; Cette assemblée m'est facile à faire, ie sçay ce que disent les impies, tu ne leur feras pas embrasser ma loy par force; enseigne-la à ceux qui craindront les tourmens preparez pour les infidelles.

---

*LE CHAPITRE DES CHOSES  
dispersées, contenant soixante versets,  
escrit à la Meque.*

*Gelaldin  
& Falkre-  
din insi-  
eulent ce  
Chapitre,  
des choses  
qui di sper-  
sent.*

**A**V nom de Dieu clement & misericordieux. Je iure par les vents qui disper sent la poussie-  
re, par les nuës chargées de pluye, par le nauire qui  
court sur les eaux, & par ceux qui partagent les biens  
de la terre, que ce qui vous a esté promis est tres-ve-